



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Ni BJP nung adentsü kecha sentong mali: Ajit Pawar

Putin-i Ukraine nung Kherson region semdang

VOL. XX NO. 186 (ADOK 186) DIMAPUR RASEMNU (WEDNESDAY) RONGCHII (APRIL) 19, 2023 ₹ 5.00

COVID-19 Nagaland: Nisung 3 dak putet

Kohima, April 18, 2023 (TYO): Nagaland nung Mongulbarnü nisung asem dak COVID-19 putetogo. Parnok ya Dimapur nung nisung 2 aser Wokha nung 1 lir.

Dimapur nung Covid puteter nisung ana dak shirangba yimya kecha mali saka Wokha nung putetba nisung dak shirangba yimya tera lir ta Health and

Family Welfare Department-i metetdaksü.

Tang Nagaland nung Covid puteta nisung 34 anepaludar ta department-isa ashi.

Nagaland nung nisung ajak agi 35,995 dak Covid-19 putetogo aser iba nungi 33,693 taneptsü angu, 782 asü (5 non-covid) aser nisung 1,517 tanga state temi ogo.



Ao Kaketshir Mungdang (AKM) ajanga "Survival Mokochung campaign" dak sendakba maparen April 17, 2023 nungi tenzüka AKM conference Hall nung inyaksangshia odor. Iba maparen ya tang aruya aliba Honibar tashi amentsü aser tang nungi anepdangshia 9:00 ako nungi tenzüka nikongdang 4:00 ako tashi inyaksangshia odor. Maneni AKM ajanga shirnoksa iba nütüzungzung agiba maparen nung tenüng züluka mali, parnoki pei local kuliser densemer nungdakba kuli kaketttem bener arutsü metetdaksür. Yangi agüja aliba noksa nung Survival Mokochung asoshi inyaksangshiba angur. (Mkg. April 18, 2023.)

DMC-i digital trade licence agütsür

Dimapur, April 18, 2023 (TYO): May 2023 nungi Dimapur Municipal Council(DMC)-i trade licence management system digitize asütsü.

Dokan kiburtem/shishilembartem atema DMC telongtet nung system tasen ka tenzütsü.

Iba inyakyim tasen ajanga trade licence meyagluba khuret agientsü aser maparen tajungba akümtsü imlar ta DMC Administrator W Manpai Phom-i ashi.

"Shishilembartem kanga junga inyakdar kechiyong parnok aikati trade licence renew asür. Trade licence holders-i migration atema DMC dangi arutsü mepishir" ta paisa metetdaksü.

April 30, 2023 tashi nung trade licence renew asütsü aser iba anogo tashi nung renew masüba trade licence ajak agientsü. Trade licence agienertem May 1, 2023 nungi tasen yanglutsüsa akümtsü. DMC-i agütsüba digital trade licence nung tesüba ama mesüi unique QR code balaka alitsü.

NSF-i lungkak aittsüba sentong athi

Dimapur, April 18, 2023 (Agencies): Naga Students Federation (NSF)-i yasung tesü Mongulbarnü Nagaland Staff Selection Board office nung lungkak aittsü sentong ayongba athi.

Nagaland sorkari Combined Staff Recruitment Examination 2022 indang personal interview thinenba sülen NSF-ia lungkak aitba sentong athiba metetdaksü.

NSF-i CSRE 2022 nung viva-voce marks 12.5% aliba nungi 5% ajemtsü akhanger.

November 11 aser 12, 2022 anogotem CSRE indang written test agia liasü. Iba ya NSSB-i ketdangshia agiba mezüngbuba recruitment examination lir.

NSSB ya NSF aser Eastern Naga Students' Federation (ENSF) ajanga sorkar nem takhangba agüja aruba sülen tentetba lir.

Nagaland state sorkari anogo asemnü atema CSRE 2022 indang interviews thinenba ya kaketshirtem den angatetteptsü atema asütsü akok ta bilemer.

Assam nung taoba telungpur 110-i BJP nung aden

Guwahati, April 18, 2023 (Agencies): Assam nung temai adokba telungpur 100 temai Mongulbarnü Bharatiya Janata Party (BJP) nung denogo.

Karbi Anglong district kübok Diphu nung taoba mapang telungpur 110-i BJP nung züngsem aküm.

Parnok ya taoba mapang Nabin Chandra Bodo-i aniba NDFB telok nung züngsemtem liasü.

Karbi Anglong Autonomous Council (KAAC) nung chief executive member (CEM) Tuliram Ronghang tsüngdang

taoba NDFB telungpurtemi BJP nung aden.

KAAC tanishir Tuliram Ronghang-i taoba mapang telungpurtem Assam BJP nung pelashishia agizük.

"Nenoki BJP nung züngsem akümba ajanga Assam kübok West Karbi Anglong aser Dima Hasao district tem nung BJP akangshir" ta paisa ashi.

Iba sentong ya Diphu nung BJP office nung agi aser Lok Sabha MP Horensing Bey o Diphu MLA Bidyaisng Engleng naprong aden.

Congress-i Dimapur nung Jai Bharat Satyagraha agi

Dimapur, April 18, 2023 (TYO): Dimapur District Congress Committee den party züngsemtemi Dimapur nung ola madoki lungkak aitba sentong ka agiogo.

Iba sentong ya Deputy Commissioner court junction nungi Deputy Commissioner office tashi agia liasü.

Dimapur nung Congress züngsemtemi Rahul Gandhi pusama Jai Bharat Satyagraha

nung shilem ka ama iba sentong ayonga agi.

Modi-Adani tesentaktep ajanga public aser linük rongsen auyazükba anema Rahul-i raraba pusama Congress züngsemtemi iba sentong agiogo.

Mongulbar nungi District Congress Committee temi pei pei district nung rally ayonga agitsü aser April 28, 2023 nü Kohima nung tembangtsü.

Assam nungertem Naga nunger luja Bihu ken atenba aitsür

Dimapur, April 18 (TYO): Tang ya Assam nung Assamese nunger Rongoli Bihu benjong mapang lir.

Yakanü iba benjongmung sentong tuluka Guwahati nung Assam government-i ayongzüka amungba sentong nung nisung meyrjang terka dak tali tesem ka nung senteper Assam nunger moatsü (Bihu) ken atenba ajanga parnoki alima nung otsü tasenka yangluogo.

Ajisüaka, parnoki atenba moatsü ken nung 'Okora Naga' Naga nunger matu ta enoka atenba agi Naga nunger mulung yirudaktsüogo.

Iba ama pelatepa benjong amungba mapang, kin ka maksüja ken tena tsüngsangba jagi Naga nunger mulung kanga yirutsüogo ta All Assam Tangsa Students' Union (AATSU) aser All Assam Naga Welfare Society (AANWS)-i taküm Guwahati nung Bihu

benjong sentong tulu ayonger Assam government mapa aitsüogo.

Ano, taküm Assam nung Bihu ken nisung meyrjang terkati külemi tena tsüngsanga alima nung otsü tasen ka yanglua Guinness Book of World Record-i aiba atema tenüngsang agüja metetdaksüba sangdong ka nung, All Assam Sema Naga Council-i iba ken ajanga alima nung nisung million aika matsüngdang Naga nunger luja atenba agi Naga nunger kanga maksütsüogo, anunggi iba kenji tang nungi kecha nunga metenshillsü aser iba ken mejemsang Ranjit Gogoi Naga nunger dang taidok meshitsü, aji mesüra iba ken o ya okadak benoktsü ta metetdaksü.

Assam nung Naga nungertem yaa Assam nunger loktiliba nung kasa shilem ka lir aser iba atemaji onoki kanga

nümadanga bilemer, ajisüaka aiben maparen aika nung Assam nung aliba Naga nunger mezüngoki mezüngmeshir ta ta parnokisa temulung machi o ka metetdaksü.

Iba osang angashia, iba ken mejemsang Ranjiy Gogoi Naga nungertem dang taidok meshiogo. Iba ken ya akhidang nungi asayamenüa tenshia aruba ken ka lir, iba yagi kin ka mezüngmeshitsü ta bilema mejemba ken ka masü saka iba ken ajanga Naga nungertem temulung yirua lira, ni taidok meshir ta paisa metetdaksü.

Iba Bihu sentong ya Assam Cultural Affairs department-i ayongzüka sentong ka liasü. Ajisüaka, parnokiba iba ken ya tasen ka masü aka akhi mapang nungi Bihu mapang tena aruba sobaliba ken lir ta dang metetdaksü.

Dimapur nungi shishilembar 2 Guwahati nung kümzük

Guwahati, April 18, 2023 (Agencies): Nagaland kübok Dimapur nungi shishilembar ana tawa pur aoba Assam kübok Guwahati nung kümzükogo.

Tena ya Bihar nunger lir aser Dimapur nung dokantem lapoka lir. April 14, 2023 nü tena ya Guwahati railway station anasa pur ao ta osang angazük.

"Tena ya Guwahati kübok Notboma tesem nung ki ka nung yua liasü aser onoki Hombarnü tena idak nung jagi kümzük. Tena iba kidang aliba osang ya onoki angazük" ta police ketdangshir kati ashi.

"Ajisüaka, onok tonga maodang tongti tai tonglokja alisang jena orr liasü. Pa kinungtsü kidang liasü aser onoki

la pua lir" ta paisa ashi.

Shishilembar ana apurtemi tena kinungertem dangi video yok aser Rs 10 lakh meshi ta police ketdangshirisa shisem.

Shishilembar ana pur aoertem tena kibong dang Rs 10 lakh meshia liasü. Tena pur aoba kuli mengutet lir aser police-i maneni bushisüngdang südar.

Manipur nung Naga nunger poktetba nungshilung azüng

Imphal, April 18, 2023 (Agencies): Manipur kübok Senapati district nung Naga nunger poktetba indang nungshilung ka azüngogo.

Hombarnü Senapati district kübok Makhel yimtsüng nung iba nungshilung saya.

"Onaeme (Oinam hill village nübertem) nungeri tanü April 17, 2023 nü onok Makhramai (Makhel village nunger) aser tanüngba Naga kintem, sub-tribes aser clans den kasa aser mapang

ka Makhrai (Makhel) nung külemi liasü aser prokshi ta iba nungshilung azünger" ta Makhel yimtsüng indang nungshilung nung zülua lir.

Iba nungshilung ajanga Onaeme indang putiotsü tera, mapang ka Makhrai nung liasü aser balala senshi aser Onaephung (Oinam Hill Village) nung teti atema anenzükba kuli agütsür.

Makhrai nung alidang nungi Onaeme nungeri sorochiokba, külemküja dang amshiba ali

chibotem yanglu ta iba nungshilung nungsa zülua lir.

"Alemlü nungi Naga nunger nem maitsü, putiotsü aser ali moatsüba Tsüngrem nem tenüngsang aser tetushi agütsür" ta nungshilung nungsa zülua lir.

April 17, 2023 nü Makhraimai (Makhel) tanishir S Pfohkreni-i Makhraimai (Makhel village) council lennirtem aser taintem lia Onaeme (People of Oinam Hill village) nunger azüngba nungshilung sayatsü.

Minister Imna Along-i Pfutsero College tesem tasenba semdang



Temjen Imna Along aser MLA Dr. Neisatuo Mero nati Pfutsero Government College tasenba tesem semdangba noksa nung angur.

Dimapur, Rongchii/April 18 (TYO): Minister, Tourism and Higher Education, Government of Nagaland, Temjen Imna Along aser 16th Pfutsero Assembly Constituency nungi MLA Dr. Neisatuo Mero nati April 18, 2023 nü Pfutsero Government College atema tesem tasenba aser danga tourist tesemtem aser Pfutsero jila kübok Tourist lodge semdanga liasü.

Minister Imna Along-i college asoshi tesem tasenba nung terenlok mapa tem repranga jaja aser sub-division nung college tajung ka yangertsü asoshi local MLA aser stakeholders tem den amalitep akatsü nungdaker ta ashi. Pfutsero College indang principal, Prof. B. Khing ajanga college inyakym aser NAAC accreditation indang osang agüja liasü.

Minister ajanga tanen makai yariba atema Dr. Neisatuo Mero-i pelaba lemsatop aser college ajungketsü aser Pfutsero nung tourism asoshi inyaktsütsü ajunshia liasü. Minister meina Wanpong Konyak, Chairman Bio Resources Mission; Kenilo Apon, Commissioner & Secretary; Additional Director of Tourism aser sorkar ktdangsur aser party lenirtem oa liasü.

Western Sumi lenirtemi NSCN/GPRN lenir Akato Chophi ajuru

Dimapur, Rongchii/April 18 (TYO): Western Sumi frontal organisations temi April 18, 2023 nü Hoito village nung NSCN/GPRN lenir Akato Chophi ajurua state nung tang yimtenren tsütsü tensa balala indang shia liasü.

Iba senden nung lokti tentet balala nungi lenirtemi Government of India dang Akato-i aniba NSCN/GPRN ya ceasefire küboki aiddaktsütsü ayongzük, kechiaser danga telok ajak ceasefire tawabangba nung lir. Nungdak dang süra onoki Government of India dang

ceasefire küboki NSCN/GPRN aiddaktsütsü atema tezüluba nung agütsütsü, ta parnokisa ashi. Western Sumi lenirtemi NSCN/GPRN dang azüdokshi nungi pila alitsü ayongzük aser telok balala nungi süaka linük tenzüker ajak adianu amai lir, ta shia liasü.

Longleng nung Auto Engineering and Church Sound Workshop sentong agi



Sound Wave Studio Mokokchung ajanga "One-Day Auto Engineering and Church Sound Workshop" tanu Longleng Town Baptist Church, Longleng nung akadang Wb.Lima Lemtur(tiyong) den tadeneritem course certificate agizüker kelen tangokba noksa.

Mokokchung, Rongchii/April 18(TYO) Sound Wave Studio Mokokchung ajanga tenzükbä sentong "One-Day Auto Engineering and Church Sound Workshop" tanü Longleng Town Baptist Church, Longleng nung shilem 9 puba(9th Phase)agiogo. Sound Wave Studio Mokokchung-i "One-Day Audio Engineering and Church Sound Workshop" sentong tenzükbä ya, Arogotem nung Sound System operator mapa ya kanga nungdaka akumba mapa ka lir, Arogotem kar asoshibo full time trained Sound Engineer mesüra Operator ka ita sen aguja ayutsübjä tashi agi makoker. Arogotem nung

noklang nung 70% shilem Chowkidar (Maintenance staff) temi dang training kecha magi-i Sound System-ji operate süa arur aser aiben sound system dak sentakba maparen aika nung timtem ajurua arur. Sound Wave Studio Mokokchung ajanga iba kum 2022 March ita nungi tenzüka 3 Months Certificate Course on Audio Engineering & Church Sound nung tangazükba agüja arudar aser dang tashi nung Nagaland tesem balala nung training-tem takokma nung agia temer kelen pei Arogo nung Sound operator mapa kanga junga inyaka odar. Arogotem asoshi lenji oagi

Sound Wave Studio Mokokchung ajanga iba sentong ya Area balala nung host süa normal course fee agia Equipments ajak bener oagi achaayanga iba sentong agia arudar. Sound Wave Studio Mokokchung-i ano tesem balala nung akatsü sentong yanglua lir ta Properioter and Course facilitator Wb.Lima Lemtur-i ashi. Longleng Town Baptist Church-i iba sentong takok ngua agitetsüsa achayangba asoshi Pastor aser Full time staff dang pelaba den ano iba sentong temeket arogotem nung arua adenba asoshi Wb.Lima Lemtur-isa tepelaba olen ka shisem.

Jail tem jila nungi pila alitsü nungdaker: Adviso Vitsu

Kohima, Rongchii/April 18 (TYO): Advisor, Prisons, Printing & Stationery, Er. Kropol Vitsu-i jila nung aliba jail tem tesem tezüluni belener aotsü nungdaker aser tepuokdak alirtem atema facility tajungba agütsütsüla, ta Mongulbarnü ashi. "Asen state nung jail tem town area nung lir, koba tim masü, anungji tesem melenshitsü nungdaker," ta pai Kohima nung Prisons Headquarters indang Conference Hall nung pa nem tenüngsang agütsütsüba sentong nung shia liasü.

tetsür pongu densema nisung 61 den sendaksema liasü aser 'convicted prisoner' nem anogo pongu special remissions agütsütsüba sangdonga liasü. Pa nem Prisons, Printing & Stationery department tem den külemi Kohima District Development Board indang chairman agütsütsüba asoshi Vitsu-i Chief Minister Neiphu Rio dang pelaba lemsatopa liasü. Sentong nung Director General of Prisons, Renchamo P. Kikon-i ashiba agi, police, court, prosecution aser forensics dak alia Indian criminal justice system nung Prison department ya tongtipangtiba tongshi ka lir. Prison ta asüba tangateba khenyongi melenshiogo, kechiaser tangbo ibai mapa tamajung inyakertem puoka ayuba kisung masü saka tepuokdak alirtem nem tanaben takum agütsütsü asoshi rangloker, ta pai ashi. Tangbo ibai correction centres ka kumdaktsüogo, anungjidang tepuokdak alirtem nem vocational training agütsütsüba ajanga mapa tamajung inyaker ka ama masü saka melenshiba takum ka kumer meyiba aor, ta pai ashi. Kikon ajangasa department-i timtem balala ajuruba, talisa administration atema kisung masü saka tepuokdak alirtem takum melenshitsü asoshi senotsü peria manguba, prison van aser ambulance tem nungdakba shia liasü. Advisor, Er Vitsu aruba sülen temelenshi alitsü imlar, ta pai ashi. Iba senden nung menden Senior Research Officer (Planning), Prison HQ, C. Lwngnyei Konyak liasü, ssistant O/Superintendent Prison Hq T. Bendangsenla ajanga sarasadem aser IG (Prisons) Imtiangshi Ao-i melepzüng o jembia liasü.

Department nung temelenshi jenti nungdaka lir, saka itemji shingaiä kisüngi meinyaktetsü, anungji officers aser staff ajunga lungjemer inyaktsüla, ta pai ashi. Pai Prison Department indang ktdangsur dang administration kisung masü saka jail tem aser yangji alirtem terenlok asoshi mera aser shisatsü lemsateptsü ayongzüka liasü. "Jail nung nungdakattem agütsütsü asoshi asenok külemi inyaktsüla aser tepuokdak alirtem takum nung terenlok asoshi vocational training agütsütsüla," ta pai ashi. Department temaba jenjangi ajungketsü asoshi akokba lenmang nung yaritsü aser pa mapang terenlok karbo alitsü imlar, ta ashi. "Asenok ajak lungjemer kumdanga bilema aser inyakba ajanga department renlokdaktsüti," ta pai ayongzük. Ato Kilonser Narendra Modi kübok Act East Policy ajanga Nagaland nung terenlok jenti bener aruja lir, national highway tem tesem aisülen state ajanga aor aser Dimapur nungi Kohima tashi railway sendakteptsür, ta pai ashi. Iba sentong nung Advisor-i Kohima District Jail nung alir

Department nung temelenshi jenti nungdaka lir, saka itemji shingaiä kisüngi meinyaktetsü, anungji officers aser staff ajunga lungjemer inyaktsüla, ta pai ashi. Pai Prison Department indang ktdangsur dang administration kisung masü saka jail tem aser yangji alirtem terenlok asoshi mera aser shisatsü lemsateptsü ayongzüka liasü. "Jail nung nungdakattem agütsütsü asoshi asenok külemi inyaktsüla aser tepuokdak alirtem takum nung terenlok asoshi vocational training agütsütsüla," ta pai ashi. Department temaba jenjangi ajungketsü asoshi akokba lenmang nung yaritsü aser pa mapang terenlok karbo alitsü imlar, ta ashi. "Asenok ajak lungjemer kumdanga bilema aser inyakba ajanga department renlokdaktsüti," ta pai ayongzük. Ato Kilonser Narendra Modi kübok Act East Policy ajanga Nagaland nung terenlok jenti bener aruja lir, national highway tem tesem aisülen state ajanga aor aser Dimapur nungi Kohima tashi railway sendakteptsür, ta pai ashi. Iba sentong nung Advisor-i Kohima District Jail nung alir

Excise Department-i Dimapur nung yi aika apu

Dimapur, Rongchii/April 18 (TYO): Excise Department ajanga April 18, 2023 nü Narcotic Cell, Mobile Squad aser Dimapur Excise lungjemer Dimapur yimti kübok tesem balala mita aoba mapang Indian Made Foreign Liquor (IMFL) cases 118 pua liasü. Iba dak sendakba nung NLTP Act 1989 nung aibelener

nisung 16 nem tapet temerenshi agütsü. Department nung unit balalai mapang shia gari tem soita mita aoba maparen inyaker aser kasa mapang unit lokteper tesem balala mita aor. Iba NLTP Act takok nung mapa kuma inyaktsü atema parnokki nüburtem dang amaliteptsü ayongzüka liasü.



nisung 16 nem tapet temerenshi agütsü. Department nung unit balalai mapang shia gari tem soita mita aoba maparen inyaker aser kasa mapang unit lokteper tesem balala mita aor. Iba NLTP Act takok nung mapa kuma inyaktsü atema parnokki nüburtem dang amaliteptsü ayongzüka liasü.

"Mafia temi state nung shinga amokmeren mesütettsü": Yogi

New Delhi, Rongchii/April 18 (Agencies): Gangster-politician Atiq Ahmad aser pa adianu Ashraf na tepsetba sülen anogo ishika lir Uttar Pradesh chief minister Yogi Adityanath-i Mongolbarnü, "joko mafia temi state nung shinga amokmeren mesütettsü," ta ashi. Paisa, "taoba mapang UP amokmerenertem tangbo UP-i parnok amokmerener," ta ashi.

"2017 masüdüng state nung temzüng ozüng shidak benoka minyaki liasü, saka tangbo state nung temzüng ozüng shidak benoka inyaksangshidar. 2017 nungi 2023 tashi nung Uttar Pradesh nung mepetmesü kecha ataloka mali aser

ibayongji curfew benoktsü kecha nungdaka maliasü," ta Yogi Adityanath-i sentong ka nung o jembiba mapang ashi.

Taoba hopta UP kübok Jhansi nung police den khatepba mapang Atiq'er jabaso Asad tepsetba sülen anogo ishika lir Yogi-i iba olen lemsatepogo.

Kasa mapang nung Atiq Ahmad, shiba Honibar aonung tepseta liasü, pai züluba shiti ka Chief Justice DY Chandrachud aser UP chief minister Yogi Adityanath na dangi yokogo, ta pa okatsüri Mongolbarnü ashi. Shiti nung kechi züluba iba indang mejangja saka shiti ya UP CM aser CJI dangi züluba lir.

"Shiti envelope ka nung sepa

lir aser iba ya kü ket nunga mali mesüra ni meyok. Shiti ya tanga tesem ka nung yua liasü aser tangar kari yokogo. Shiti nung kechi züluba lir aji nia mejangja. Atiq Ahmad-i timtem lendong mesüra pa tepsetra shiti ya Chief Justice of India aser Uttar Pradesh chief minister dangi yokang ta shiogo," ta pa okatsür Vijay Mishra-i ashi.

Atiq aser Ashraf na medical check-up atema anir oya aliba mapang aonung 10 ako shi nung live TV nung khaset. Tena akhar Sunny Singh, Lavlesh Tiwari, aser Arun Maurya nunger ya osangbener ama aru aser police temi meketbanger aliba mapang tena dak injang khalokja liasü.



2019 küm Pulwama maka CRPF sepai 40 tepsetba dak sendakba nung taoba J&K Angh Satya Pal Malik-i Centre sorkar aitsüba sülen pa anema longkak aiba mapang Indian Youth Congress pusemer kati placards amer tangokba noksa nung angur.

Ni BJP nung adentsü kecha sentong mali: Ajit Pawar



New Delhi, Rongchii/April 18 (Agencies): Nationalist Congress Party lenir Ajit Pawar, Bharatiya Janata Party (BJP) nung adentsü akok ta bilema aliba mapang ka nung pai, pa BJP den longjemtsü atema kecha sentong mali aser pai NCP kodanga metoktsütsü ta shiogo.

BJP den tesendaktep junga akümba den parnok anema kangabo tekong meranga menokdakba mapang ka nung Ajit Pawar-i party melentsü akok ta osang balala prokshio, ajisüaka tang pai iba ken o ya jangjashitsüogo.

Media osang kar ajangabo Pawar, BJP nung adentsü akok ta shiogo. Ajisüaka NCP lenir yagi iba osang aitsüogo aser

item osangtem ya tai aser tamendakdak makaba olulu osangtem lir ta shiogo.

Ajit Pawar-i taoba hopta pa adentsü aliba senden ka ajungbena thija, BJP aser Chief Minister Eknath Shinde-i aniba telok indang jembiba sülen pa tamendakdak melenshitsü akok ta bilema liasü. BJP ya Shinde-i aniba sorkar nung shilem ka lir.

Taoba mapang NCP tekolakba Sharad Pawar-i ibala mesükba osang adokba ya tai ta shiogo aser par kinunger aser party lenir tejen Ajit Pawar-i party MLA tem senden kecha mayong ta shia liasü.

Purandar nung osangbenertem den

sensaksema mapang Sharad Pawar-i, media mulung nung kechisa sensaksem dar iba ya onok mulung nung mali, ta ashi.

"Iba sensaksem ya kecha tongtibang masü. Item osangtem nung kecha tetezü maket. NCP dak sendakba nung onok ajak kodaser party tashi taitba kümdaktsütsü ibaji dang bilema lir aser shinga daka tanga tebilemba kecha mali," ta party tekolakbai ashi.

"Party indang state tir (Jayant Patil) pa kübok aliba tesem nung local election ka atema mazüngi inyakdar aser ano party lenir Ajit Pawar-a party mapa nung aser ajak dang len sayutsü atema mazüngi lir," ta pai PTI dang ashi.

M o n g o l b a r n ü osangbenertem den sensaksema mapang, pa BJP nung adentsü ta olulu osang prokshiba aitsüogo aser ashiba agi, par party kodanga BJP den madentsü ta ashi.

Kasa mapang nung Shiv Sena (UBT) lenir Sanjay Raut-ia, Deobarnü ken o jangjashija, Sharad Pawar-i tawa pa dang nisung kari party melentsü atema telemtetba agiyonga par party kodanga BJP den melungjemtsü ta shiogo, ta ashi. UBT aser NCP den longjemter lir.

NIA-i Indian High Commission raksatsütsü merangba bushisüngdangtsü

New Delhi, Rongchii/April 18 (Agencies): Taoba ita London nung Indian High Commission raksatsütsü merangba aser longkak aiba ken o National Investigation Agency (NIA)-i bushisüngdangtsü, ta ketdangsurtemi Mongolbarnü metetdaksü.

NIA-i iba ken o ya Delhi Police special cell ka ket nungi belenzüksü, shirnoki Unlawful Activities (Prevention) Act aser Prevention of Damage to Public Property Act kübok ken o ka benoka liasü, kechiyong ken o nung bendanglen oa aliba India nungertemi ozüng anema inyaksangshiba densema lir.

Ketdangsurtemi ashiba agi, 2019 küm anti-terror probe organization dak sendakba ozüng yanglushiba sülen, bendanglen atalokba kiralongrar ken o bushisüngdangtsü atema NIA mapa lir.

March 19 nü Pro-Khalistani pusemertemi London nung Indian High Commission raksatsütsü merang aser High Commission complex kima longkak aitba mapang India wako ka atsüzü ka liasü. Punjab Police-i sayutsüngir Amritpal Singh aputsü merangba sülen anogo ka lir iba ya ataloka liasü.

Ministry of Home Affairs kübok Counter-Terrorism aser Counter Radicalisation unit-i iba ken o NIA nem agütsüogo. Union Home Secretary Ajay Bhalla-i taoba hopta British

telemtetba ya agia liasü. London Indian High Commission kolak nung yimzüdakja aliba India wako ka longkak aitertemi atsüzüksü aser parnoki separatist Khalistan wako bener yimyim ayima longkak aita liasü. Iba tatalokba sülen nisung kar pua liasü.

Mission nungi ketdangsurtemi ashiba agi, mission amaktsü merangba tamakok nguogo aser wako tang mera taketba yimzüdar. Metropolitan Police-i ashiba agi, security staff züngsem ana terara yirua liasü, saka mozükidangi oa anepalutsü kecha nungdak maliasü.

Iba tatalokba sülen India-i New Delhi nung amenoka aliba British deputy high commissioner jaok aser security ka danga maliba indang ken o ashishia liasü.

Iba dak sendakba nung Ministry of External Affairs-i ashiba agi, UK sorkari India High Commission aser staff tem atema security magütsüba ya India-i magizükteter ta shiogo.

Permanent Secretary, Home Office, Sir Matthew Rycroft-i aniba team den sensaksema mapang Union Home Secretary Bhalla-i, pro-Khalistan nungertemi UK indang asylum jenjang mashiyimi amshiba atema New Delhi-i shisabulua bilemba lemsatepogo aser extremists

tem tali meita atatsü aser parnok anema jenjang tapet agitsü atema mepeshia metetdaksüogo.

Modi-i Brehostibarnü global Buddhist conference tenzüksütsü

New Delhi, Rongchii/April 18 (Agencies): Ato Kilonser Narendra Modi-i Brehostibarnü New Delhi nung anogo ana amungtsü aliba Buddhist monks, diplomat, aser scholar tem indang global conference ka tenzüksütsü.

Iba sentong nung linük 30 nungi lenirtemi shilem agitsü.

"India ya Buddhism poktetba lima aser Buddha asoba tesem lir. Anungji Buddhist puti otsü aser jakzükba indang alima ajunga nem metetdaksütsü atema asenok mapa lir.. Iba sentong ya linük aser sorkar

nükla nung shilem ka lir," ta Union culture minister G Kishan Reddy-i ashi. "Iba sentong ya Ato Kionser-i lapoktsütsü," ta paisa ashi.

Reddy-i ashiba agi, iba conference ya Union culture ministry aser International Buddhist Confederation na longjemter ayongzükba agitsü. Paisa, sobaliba taren nungi iba conference ya kanga tongtibang aser iba sentong ayongzükba agiba ajanga tesendaktepa tajungba akümtsü, ta ashi.

"Sentong nung shilem agirtemi

tanü alima nung ken o tongtibangtem benoka sensak asemtsü aser Buddha Dhamma dak ajemdaker telangzüba bushitsü merangtsü," ta Reddy-isa shisem.

Pai ashiba agi, nungtugu Buddhist monks temi India semdangtsü aser tang mezüngbuba conference nung shilem agitsü, ta ashi.

"Buddhist philosophy aser tebilemdangba dak ajemdaker tang alima nung tajangshiba balala bentettsü atema sensaksem akatsü," ta Reddy-i metetdaksü.

<p>बैंक ऑफ बड़ोदा Bank of Baroda</p>	<p>DIMAPUR BRANCH Nyamo Lotha Road (Church Road) Dimapur - 797112, Nagaland Email: dimapu@bankofbaroda.com</p>
	<p>METONGSHITSÜR 03.04.2023 sangdong osang koba 04.04.2023 anogo nung Nagaland Post aser Tir Yimiyim nung kiojen meyipa agiba osang metetdaksüogo. Maneni 18.04.2023 aser 18.04.2023 anogo Nagaland Post aser Tir Yimiyim nung Sale Notice agütsüogo. Temalen shisema aliba notice anaprongla nung kiojen terasa nung south aser east len arrtsü aibelena adokja lir. Arrtsü yamai metongshia züngdaksüner: South: Colony Road / Link Road East: Mr. Santosh Malakar Notice nung tanga onüktem ajak kasa dang asütsü. Date: 19.04.2023 Place: Dimapur</p>
<p>Authorised Officer (Bank of Baroda, Dimapur Branch)</p>	



TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 19, 2023

Naga nunger Okora !

Alemli asenok tanü ama masü, temang merükmejua mashi aser azüing-zülua memetet aser temang ajak ayima süoshia magi ser tzümalen aonsutsü agi metsü melena jajadang Assamese nunger tsüingdang asenok temang aser libaliroji kanga tesempatsüka liasü. Iba jagi Assamese nungertemi asenok Naga nungertem dang 'Okora' kecha memetetba nisung, matumara ta luja jembia liasü. Iba nung jagi Assam kaketrejutem nung azüingtsü asoshi tazüingtsü kaket zülurtemia 'Noga Okora' sangro mejema tanurtem nem züingdaksüba tsüraburtem nungi angazüker. Ashiko, tamalen Assam nung azünger Naga nunger, talisa Aortem karibo iba lessonjia zünger asütsüa akok. Joko, tanü asüing lanurtemibo item libaliro otsütemji memetet nungji, alemli nungi asenok ya tanü ama merükmerüker tangar adoksa melitetaka azüing aser zülubo shia meteta liasüba ama bilema alitsü. Ajisüaka, taaktsüka saka külenbo tia ajung ta asütsüsa yakanü Guwahati nung Assam nunger moatsü 'Bihu' amongba mapang nisung meyrirjang terka (11,000) dak tali kentener aser tsüingsangertem adenshia alima nung otsü tasen ka yanglutsü asoshi tsüingsanga atenba kenji akhidang Assam nung school nung Naga nunger luja azüingba sangro "Noga Okora" ken liasü. Atangji, iba ken ya tasen masü, anungji kima yimdong nung asayamenüa tenshibaji balaka, saka alima ajaki repranga lia Assam Chief minister, Himanta Biswa Sarma anir Naga nunger okra (okora) ta pelatepa atenbaji asenok Naga nunger aser talisa par den asenokang tali anasatapa taliba alir asünungji, asenok Aortem asoshi kanga süoki ia shisadangtsü onük tuluka lir. Asenokbo kanga temulung lema Naga yimten tebilemtsü ken o India den latettsüba onük nungi tenzüker election mapang aser election temer government akümtsüba maparen nunga Assam Chief minister Himanta Biswa Sarma-ba bushia oa shisalemsateper aser tejaoka jaoker. Ashiko, pa tenyaba mapatem ajaki angatibo masütsüa akok. Iba amaji asenokbo pa ali agiang asenoka taküma alir ama, pa dak anadaker aliba mapang ka pai anir nisung meyi terkati alima tsüingdang Naga nunger matu ta tena tsüingsangbaji Naga nunger asoshi maksü ulura lir. Ajisüaka, kodang asenok tanü libaliro jenjang reprangdangdir, asenokia dena asenok ya 'okora'-a ta shitettsüsa alir. Taoba küm Himanta Biswa Karbi Anglong sema jajaba mapang, pai nübortem dang 'ni nenok alidak ajak nung medical college lapoktsütsü, kechiyong nenok anasa alir Naga nungertembo tang tashi par state nung medical college kata maka, anungji parnoka item medical college mozü kitem jagi taneptsü bushia arutsü aser tazünga azüingtsü ta yimjak nung metetdaksüba bilemteter. Tetezüji, küm 60 jakdang Assam yimten kübok liasüba Noga okora-tembo ano tang tashi nüchi maküma ta ashirba alitsü aser aji asenoki manganüyonga masüa ta meshitettsü. Asenoki kodang asenok yimten tia indang ya bilemdangdir tang tashi asenok Assam den arrtsü tebilemtsü lir. Ano külen Assam government-i anir Naga yimten tebilemtsü ken o latettsü indang jembidang, tang Assam kübok aliba alushi nungi inch kata Nagaland nem magütsütsü ta nokdaker. Ajisüaka, iba ama kidanger dakji asenokbo temulung lema yimten aser lokti tentet lenirtemi sempet bentsür Assam Chief minister-ba dang Naga yimten ken o latettsüba nung tongti shilem agitsü mepishiba asenoki angur aser angashir. Ajisüaka, paibo item, nisungtemji 'okora'-a ta ashir. Atangji, alima tsüingdang jakdaka maksütsü nungji, Assam nung alir Naga nunger lokti tentettemibo Bihu ken nung Noga Okora enoka atenba mapaji aitsüogo aser taidok meshitsüla ta takangbaa agütsüogo. Ajisüaka, Assam nungertemi bilemba Noga Okora-temji Assam nung alir Naga nungertemji masü tenem nung aliba Naga nungertem asutsüa akok. Joko, tangri asenok dang okora majatsüsa asenoka alitsüla. Tangari asenok dang okora ajabaji tapi agibo masü, kechiyong asenoki yimten aser lokti jenjang ya nüchi purtem aliba lima aser loktibo memesük, tajung aser shitakbo kecha mali saka shingaia zak-a masür. Ak amato dang, tebok süngra ojang, atangji tang Bihu aruba yabo ni tang tashi 'Naga Okora'-a ta metetba agi langogo.

OLEMSABANG

MOJING TSÜNGDANG APUDAKBA

~ Limawati Longchar, Kohima

Küm ishika tejaklen Kohima, Dimapur aser tanga town kar nung lanurtem aika Satan külemteper ta tsüraburtem aser arogo tena kanga shisa bulutepogo. Arogo aser tamangertem aikati iba khuret asoshi kanga sarasadema liasü. Saka ibai oda khen süia aoba wara-mopung ka ama oda küm anashi ka nung süshia ao. Ya kudasür yamaji mela-mela samaa ao süra - iba maparen ya lanurtem asoshi oda parnoki tendanga (experiment) inyakdangba, angashibaji oda asayar ama khen atangji nung metetnüba ka dang liasü. Temulungjang nungi adokba tamangba ka masü saka oda alima mopungsem ka nem khen onshidaksüba dang ta asenoki angateter.

Iba tatalokba yagi lokti aser arogo nung timtem aser teraksa kangabo madokdaksüi süitema ogo. Saka tang taintem, lokti lenirtem, yimsüsürtemi mojing tsüingdang apudakba aser pa külemba ya koda asütsü. Ni kodang taintemi Mojing külemba ta ashir, nisung aikati manganütsü aser kodang koma Mojing külem ta bilemtsü aser ashishitsü südi. Anungji ni ashir, Assembly election mapang asenok Aor Khristantem (tanga Naga nunger odang toktsüdi) aikati Mojing tsüingdang apudakogo aser külemogo. Kechiaser mojingi sayuba/aginüba mapa inyakbaji pa dang tashi angaba aser pa dang tashi angabaji pa dang apudakba aser külemba den saku.

Mati 4: 8-9 nung yamai shia lir, "Ano mojing jagi pa tenem kanga talang kati anir atu, aser pa dang alima yimlitem ajak aser item sentsüwangshi sayu; aser pai Yisu dang ashi, "Nai apudaker ni külemra, item ajak ni ne nem agütsütsü". Yisui kechi langzü asenoki meteta lir.

Saka asenok Aor tamangertemi iba alima yimli aser iba sentsüwangshi aginüdang asenoki kechi inyak khen bilemdangti. Temenen aser mojing mapatem - sübokrem (voyo ayokba aser aliba), tashiyim/teka yitepba, amokmeren, ochimashi, külakoktsüba, temesepba chiyongtsü (alcohol and drugs) achiba/amshiba, yimten aser lokti tashi tim mesüi amshiba, tangar temeten (rights) auyaba/rakzükba aser nisung tepsetba asenoki election nung takok ngunüdang benshiogo. Tetezü alima yimli aser iba sentsüwangshi aginüdang asenoki temenen/mojing mapa inyakogo - tetezü asenoki mojing tsüingdang apudakogo aser pa külemogo. Iba o aikati manganütsü aser hau ta masütsü südi; tejembir tang yabo tali tabong jembir ta jashia tongloktsütsü südi. Saka ochi shia (honestly) Lai o den medemtanga asenoki shisadanga item temalen ashiba mapatemya atangji mojingi mulungba aser tuyuba mapatem ta asenoki angatettsü.

Lanurtemi mojing külembatubo parnokia tai ta meteta dang inyak, anungji yakta parnoki iba temenen mapaji toktsü. Saka asenok taintem, linük aser nübur lenirtem aser yimsüsürtem, asenoki aseni inyakba mapatem ya tai aser temenen ta mebilemra/mangatetra itemji toktsütsü tasak asütsü. Saka asenoki ya meteti, item tai aser temenen mapatem ajanga asen lima, kija aser lokti, taküm aser tanela ajunga tesamadaki ludaktsütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung kiralongrar temi tamanger 33 tepset



Nigeria nung Kaduna state kübok Ruji yimtsüng nung April 17, 2023 nü Khristanpur parnok 33 tasü mang aremdang tangokba noksa ka yangi angur.

Abuja, Rongchii/April 18 (Agencies): Fulani shiruru metsürtem aser danga kiralongrar temi Kaduna state, Nigeria nung Honibar aonung nungi Deobar anepdang (April 15-16) tashi amakdang Khristanpur 33 asü.

Yangji alirtemi ashiba agi, shiruru metsürtem den ano nok-nü bena aliba kiralongrar temi April 15 aonung 10:00 ako meta Zangon Kataf County kübok Khristanpur timba aliba Rujin yimtsüng amak.

"Imlibilema onük atema sarasademjang. Ibai tammang Deobar lir, kechiaser shiruru metsür aser kiralongrar temi Deobarnep (April 16) Khristanpur 33 tepset. Parnok tanü Hombarnü remogo," ta yangji alir Mugu Zakka Bako-i text message ajanga Morning Star News dang ashi.

Kaduna state nung Anglican Diocese of Zonkwa indang bishop, Rev. Jacob Kwashi-i tamanger 33 tasü mang aremba sentong agia liasü.

"Tesüba küm tenet sür tasadang nung onok southern Kaduna nung alirtemi temenen mapa jenti ajangshia arur aser parnok ozü li nung temenen salatsü telemteba agia lir aser parnok aji kodang anantsür memetet," ta Kashi-i ashi.

"Kaduna state indang sorkara süang mesüra Nigeria sorkara süang, parnok iba temenen spittsü tashi lir, saka ochiji, parnok iba temenen anendaktsütsü renema aser molunga lir asü?"

Southern Kaduna state nungi Khristan lenir aser taoba mapang Evangelical Church Winning All (ECWA) nung

tongti zülur Rev. Bauta Motty-i sangdong ka nung ashiba agi, Runji yimtsüng amakba ya yangji hopta ka nung tamanger dak asemben buba timtem

agütsür alitsü.

Runji lendong nung nisung aika yiru aser ki aika rongdoktsü aser sorkar ketdangsür temia ki 40 raksatsüogo ta shiogo, ta pai ashi.

"Aji masü dang anogo pezü tejakdang kasa yimtsüng nung tamanger ana tepset. Kasa anogo Atak Njei yimtsüng nunga tamanger 17 tepseta liasü," ta Motty-i ashi.

Yangji alir Grace Bamaiyi-i ashiba agi, yimtsüng nung ki tasadang ka jungnüa rongdoktsü. Ano John Kantiyok-ia ibai yimtsüng ajunga samatsütsü merangba lir ta ashi.

"Zangon Kataf Local Government Area nung Runji yimtsüng asoshi asenoki sarasademtsüti, kong Deobar aonung lendong tulu atalok," ta Kantiyok-ia text message ka Morning Star News dangi yoka liasü.

"Khristanpur aika tepsetogo, aser yimtsüng nung ki tasadang ka jungnüa rongdoktsü aser raksatsü. Ibai yimtsüng nung alir ajunga takum samatsütsü merangba lir."

Zangon Kataf Local Government Area indang council ketdangsür Francis Sani-ia sangdong ka nung tamanger 33 tepsetba shia liasü.

"Lendong agütsür aika arua tetsür aser tanurtem timba sür nisung aika takum samatsü, ki nung mi senloktsü, ki kar mita ao aser iba mapang nisung 33 asü, nisung pezü kanga sashia yirua kar Specialist Hospital-i bener ao, sen million aika jenjang ki o jen raksatsü. Onok kanga aoksar aser süngmanger," ta Sani-i ashi.

Kaduna state indang odongtar Samuel Aruwan-i ashiba agi, sepai temi iba lendong agütsür den kanga sashia khatap aser parnok dang tashi general area nung lir.

"Osang tejangja ataba mapang Governor Nasir El-Rufai-i iba lendong aitsü. Governor-i mangyimer kibong den asükhü lemsatet aser asür asoshi sarasademtsü. Yirur alirtem tekeraba nung taneptsü angutsü pai sarasademtsü," ta Aruwan-i ashi.

2022 küm alima nung tamangba yimsü mechi Khristanpur tepsetba ya Nigrea nung timba (5,104) liasü, ta Open Doors' 2023 World Watch List (WWL) ajanga ashir.

Kasa mapang Khristanpur pua bener aoba (4,726), tashiyim amshia shi nung medemba mesüra merenshiba, tashiyim agi kibong akumba mesüra shi aser tekolok shisatsü nung merenshiba nunga temaba jenjang nung lir, aser tamangba yimsü nung ajemdaker ki aser businesses amakba nunga timtiba lir. Taoba küm tekülem ki amakba aser linük sasep nung tamangertem tesem balala nung prokshiba tsütsüa Nigeria ya jenjang tanabuba nung lir.

2023 küm World Watch List nung Khristanpur asoshi linük tamajungtiba 50 rongnung Nigeria ya taoba küm jenjang 7 buba nung aliba tang jenjang trok buba nung lir.

"Fulani, Boko Haram, Islamic State West Africa Province (ISWAP) nungi telungpur aser dangar temi Khristanpur amaker, tepseter, tashiyim amshia shi nung medemer, rongsen meshitsü mechi aser alar ama ayutsü asoshi pua bener aor," ta World Watch List ajanga ashi.

"Taküma Khristanpur timba aliba linük south tsütsü azüdokshi angur. Nigeria sorkari tamangba yimsü nung ajemdaker azüdokshia reshikangshiba magizüker, anungji Khristanpur temeden anema inyakba asoshi merenshitsü tetsübo makai inyaker."

Nigeria tesem ajungalen aser Sahel nung Muslim Fulani nung million aika lir aser parnok ya kin balala nungi jakzük aser parnok Islam yimsü taroktiba mamshir saka Fulani kari radical Islamist ideology sülen anidaker, ta United Kingdom indang All-Party Parliamentary Group for International Freedom or Belief (APPG) ajanga tawa sangdong ka nung ashi.

"Parnoki Boko Haram aser ISWAP den sako mapa inyaker aser Khristanpur dak tenük yoker," ta APPG osang ajanga ashir.

Khristanpur litsü-lika agitsü aser Islam yimsü benoktsü tejangraba nung shiruru metsürtemi Nigeria indang Middle Belt nung Khristanpur dak timtem agütsür südi, ta tamanger lenirtemi ashir.

ANO GO ABEN TSÜNGREM DEN

Temeim aser tesemba odangba (T.Ken 97: 1-12)

Tuodangba tajung. Asenok shidak odanga melira asenoki junga mejajatettsü. Khristan taküm nung ibai nungdak. Iba jagi ken züluri ashi, "O nenok Kibuba meimertem, temenen sembaang!" (t.10). Na asoshi idakji tuodangba ka lir. Khristan rongnung kati ka mesempateptsüla, saka parnok temenen sempatsüla.

Tanü alima nung temenen tsütsü asenok yimyaliro balala akatsü akok. Mezüngbuba, asenoki ibaji nokdangtsü akok. Khristan aikati ibaji meinyaker. Tamajungba taliang adokdaksür. Parnok Satan ket nung asayar. Mesüra, tajung Samaria o entepba nung Putir aser Levi nungbai inyakba ama tamajung ngur tenük amur odang süa aotsü akok. Mesüra asenoki ibaji tepu shitepa aser teka ajitrepa aremzüktsü akok. Saka Tsüngrem O i ashir, asenoki tamajungji sempatsüla aser anema nokdaksüla.

Asenoki tamajungji sempar kechiaser asenoki Kibuba meimer. Asenoki Pa meimra, Pai meimba mapa asenokia meimtsü aser Pai sempaba mapa asenokia sempatsü. Meimchir tesendaktep nunga ibai shidak lir. Nai kar dang meimra pai/lai meimba mapatem naia meimtsü, aser pai/lai sempaba mapatem naia sempatsü. Kodang Tsüngremi tamajunger o bendanger asenokia Patsütsü dener. Lot ama asenoki mesüner, pa temulung mepelai liaka, pa Sodom nung majungji aremzük. Lot Sodom nung kechi atema ali ajakji Sodom mi agi arung dang ajak mitsü aküm (Lipok 19). "Pai temeshi nisung kümzük; tamajunger teka nungi Pai parnok kümzük." Tsüngrem asenok tsütsü lir, shibai asenok anema arutsü ?

Alima nung tamajung tsütsü ne mulungsentsü kechi? Nai Kibuba meimra nai tetsüngda nung alitsü makok. Nai tamajungba anemtsüla aser nokdangtsüla kechiaser ibai lendong lir. Iba anema noktaksü Tsüngrem dang tashi meshiang, aser shirnoki tamajung inyaker parnok tsüngdang tatishitsü tajung ka süa liang.

Uganda nung Good Friday sentong nung bomb pokloktsü

Nairobi, Rongchii/April 18

(Agencies): Uganda anüolen tekülem ki ka nung April 7 nü Good Friday sentong agiba mapang Muslim yimsü akhanga amanger temi totzü indang bomb ka pokloktsü, ta osangtem ajanga ashir.

Kamwenge district kübok Biguli nung aliba NABI Pentecostal church nung iba bomb ajanga tenlaki shilem ka, anena aliba gari ka aser motorcycle ishika raksatsü, ta yangji alirtemi ashi.

Arogo indang security ajanga temolung melemi alir par trok rongnung nisung ka puogo. Iba nisungba ya Kasese District nung Kasese Municipality kübok Kilembe quarters, Kamiba Ward nungi Bwambale Sadadi liasü aser pa police dangi aru, ta ashir.

"Polie temi arishi küm 28 tain Bwambale dang asüngdangya asü aser pai Allah tenzükba yimya la ama kotak nung sempet angutsü asoshi temeshi Ramadan ita iba jihad mapa inyak ta nangzük," ta osang ajanga ashi.

Iba lendong ajanga yangji aliba Khristanpur aoksatep.

"Züngsemtem sarasadema aliba mapang ola tulu adoka poka mi adok aser tekülem ki tejaklen mi kaolok," ta osang ajanga ashir.

Arogo indang security aser züngsem temi temolung melemi alir indang gari Bajaj Boxer motorcycle ka apu, ta pai ashi.

"Arogo indang security aser arogo züngsem temi parnok kanga meranga arishi saka lendong agütsür pongu jena ao. Security personnel temi Bwambale apu aser police nem osang agüja liasü."

Police temi maneni bushisüngdang aser tanüngba nisung pongu ya aputsü meranger.

Uganda nung Khristanpuri reshikangshi timtem balala ajuruba rongnung iba ya tasemba alitsü.

Uganda indang constitution aser danga ozüng temi pei tamangba yimsü dangar dang sayutsü aser tamangba yimsü ka nungi kati melentsü densema tamangba yimsü tsütsü temeden agüja lir. Uganda nütsüng yongsük shilem 12 shi Muslim nung lir aser parnok timba lintik anüdoklen alir.

AO OSHI ANGAZÜKDAK:
TANÜ ANGAZÜKTSÜBA OJANG



Pongdak

(*adj*) tzü telongi melui tema nung ali (float)

* Süng tuluba tzü telongi melui **pongdak**.

Pongdang

(*v*) joka tur ajangdang (jump over)

* Arem shirurui tarok ajak **pongdanga** aoer.

OLONG PAITEP # 6489

1			2			3			4
			5		6		7		
8									
			9						
	10								
								11	12
			13				14		
15						16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T _ _ _ lu - (3)
- 10. Takdang temalen - (9)
- 11. Tesa _ _ _ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ ur - (3)
- 4. Kiojen yangludak - (6)
- 6. _ _ _ _ _ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. _ _ _ _ adenshi - (4)
- 14. Tsünüsönongtsü adokdak - (3)

OLONG PAITEP # 6488 TELANGZÜBA

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

Agüja aliba noksa nung meputepi aliba 9 bushiang



Happy Birthday

Tenüng : Jala Tiasem Imsong
 Tasoba anogo : 19th April 2021
 Küm : 2 (Ana)
 Talidak : Aoyimkum, Dimapur Nagaland

Tsüngremi Jala küm ana tashi anir aruogo, ano maneni tarutsü anogotem nung arishi anema aliba moajang ta kinungertem ajak sarasadem
 ~ Temein Kinungertem

Arunachal Pradesh nung NSCN-K-YA telungpur ka apu



Dibrugarh, April 18, 2023

(**Agencies**): Arunachal Pradesh kübok Longding district nung sepaitemi telungpur ka apu.

Assam Rifles indang Longding Battalion aser District Police külemi mita aodang NSCN K-YA captain Wangbet Wangjen apu.

Pa ya Wancho Region nung

Kanubari area indang Rajapio liasü aser pai Longding District nung tashiyim agi sen saru.

Pai yimdaklirtem aser shishilembartem amokmerenba indang nangzükogo.

May 2022 nung Wangbet Wangjen-i Laukxim nung head gaon burah pur ao. NSCN K-YA ajanga tashiyim agi sen meshiba magütsüba atema pa apu.

Idangji yimdaklirtemi tejashi nung May 9, 2022 nung NSCN K-YA anema lungkak aitba sentong ka agia liasü.

Pa ya NSCN K-YA indang tongtipang tanishir ka liasü aser pai Wancho region nung alirtem kanga amokmerena aru.

AR sepaitemi Wangbet Wangjen ya Longding Police Station ket nung agütsüogo.

Meghalaya nung 'heatwave' ajanga school shibanger

Tura, April 18, 2023

(**Agencies**): Meghalaya kübok West Garo Hills district nung anü kanga tatsük apuba ajanga anogo ishika atema school shibangtsü.

West Garo Hills district nung school ajak April 19 nungi 21, 2023 tashi shibangtsü tetuyuba

agütsüogo.

"West Garo Hills district nung heatwave ajanga primary, middle, secondary o higher secondary school ajak shibangtsü" ta West Garo Hills deputy commissioner-i metetdaksü.

Hombarnü Tripura sorkaria April 18 nungi April 23 tashi

sorkari yariba school ajak shibangtsü tetuyuba agüja liasü.

Tripura nung heatwave ajanga state sorkari district magistrate aser collectors 8 dang heat wave, sun stroke aser sun burn nungi jenbua alitsü atema maparen inyaktsü tetuyuba agütsüogo.

Karbi Anglong nung Rs 3 crore alang heroin apu

Diphu, April 18, 2023

(**Agencies**): Assam kübok Karbi Anglong district nung police-i nisung ana ket nung heroin bena aliba apu.

Tena ket nung Rs 3 crore alang heroin bena liasü. Assam police aser CRPF

personnel-i gari ka mita reprangdang heroin bena aliba angu aser iba sülen tena apu.

Karbi Anglong district kübok Khakrajan tesem nung check point ka nung tena apu. Iba gari ya Nagaland kübok Dimapur nungi aruba liasü.

Gari indang dashboard nung sapon pongdang 54 nung heroin ji miima enoker bena liasü. Tenati bena aliba heroin ji 687.26 grams liasü.

Tenaprong ya Assam kübok Barpeta district nungi lir.

Manipur nung Myanmar arrtsü anasa KYKL züngsem ka apu

Imphal, April 18, 2023

(**Agencies**): Manipur nung Myanmar arrtsü anasa Assam Rifles sepaitemi Kanglei Yawol Kanna Lup, (KYKL) telungpur ka apu.

Telungpur kar Myanmar nungi Manipur telungi aittsü meranger ta osang tejanga ka angazükba sülen AR sepaitemi mendanga ata.

Churachandpur district

kübok Leisan Tampak anasa KYKL züngsemtemji apu.

Iba nisung ya Manipur kübok Sangaikot police station ket nung agütsüogo.



Mongulbarnü Assam nung temai adokba telungpur 100 tema Bharatiya Janata Party (BJP) nung adenba sentong nung agiba noksa ka angur. Karbi Anglong district kübok Diphu nung taoba mapang telungpur 110-i BJP nung aden aser parnok ya Nabin Chandra Bodo-i aniba NDFB telok nung züngsemtem liasü.

Putin-i Ukraine nung Kherson region semdang

Moscow, Rongchii/April 18 (Agencies): Russia Tir Vladimir Putin-i Ukraine south tsütsü Moscow kübok aliba Kherson region semdang, ta Kremlin-i ashi. Iba mapang pai mitkar lenirtem nungi osang angatsü atema senden ka nung aden ta ashi.

Putin yagi Ukraine kübok Luhansk region ya semdangogo ta ashir. Russia-i region anaprong rakzükoogo ta ashir saka kata ajungabo par kübok masü.

Putin indang odongtar Dmitry Peskov-ibo April 17 nü pai Kherson semdang ta ashir. Saka Kremlin indang website nung

post sütsüba video den iba sangdong meputeper.

Putin indang press office ajanga video ka sayaba nung Russia tir yagi Easter sodi arutar, ta tejangja ashiba angashir.

Russia nung Orthodox Easter ya April 16 nung amunger, koba Pekov-i ashiba anogo sülen lir.

Iba sülen Kremlin website nung aliba video ya yanglushiogo, kong Putin-i 'arutar' ta ashiba ojang indokogo.

Russia nung leniri iba ama tesem sema senzüba ya kanga ajema lir, ajisüaka pai March ita Mariupol yimti ajungbena

semdanga liasü.

Kherson nung mitkartem senden nung Putin-i parnok dang duty nung meinprong mesüner saka tensa renloka aoba nenok nungi metettsü, nenok bilemba angatsü aser osang lemsateptsü tongtipang, ta shia liasü.

Taoba küm tatemlen Russian sepaitem Kherson yimti nungi meyiba oa Moscow-i 2022 küm February ita nungi Ukraine makyonga arudang regional capital ka kisung agiteta aliba Kherson ya par ket nungi sama.

Ajisüaka region kar Russia nung kübok lir.

G7 minister temi Russia nem tenokdangba agütsütsü bangjem

Tokyo, Rongchii/April 18 (Agencies): Ukraine amakba atema G7 foreign minister temi Russia nem tenokdangba tesashi agütsütsü bangjema den Taiwan Strait aser mangatettep aliba South China Sea nung inyakyim balala benoka inyaksangshiba atema China aitsüogo aser Beijing dang international community nung khuret angatetba züngsem ka ama inyaksangshitsü ayongzükoogo.

Japan kübok Karuizawa jila nung anogo asem senden maneba sülen Mongolbarnü iba osang ya sangdonga liasü.

G7 lenirtemisa nuclear aser ballistic missile programme atema North Korea aitsüogo aser Sudan aser Myanmar nung mepetmesü adoker aliba atema shisabulua bilemba lemsatepba den Taliban dang tetsürtem non-governmental organisations (NGOs) aser United Nations nung minyaksü atema tenokdangba agütsüba ya agingsü khangogo.

Iba document ya Hiroshima, Japan nung taruba ita G7 summit akaba mapang lenirtemi amshitsü atema template ka ama renemogo, kong Iran indang nuclear programme aser tanga lendongtem indanga densema lir.

Onük ajak ronung tongtibangsa sensak asembaji Russia-i Ukraine amakba aser China-i Taiwan temeket nung military inyakyim balala benoka inyaksangshiba indang liasü.

Ajisüaka senden nung Russia-i Ukraine amakba indang onük dak tali rangloker sensaksemogo.

Iba telok nung United States, Japan, Germany, United

Kingdom, France, Italy aser Canada densema lir aser parnoki ashiba agi, "Russia-i civilian aser tongtibang civilian infrastructure tem amakba amala rara nung aibelenba memerenshi metoktsütsü."

"Onoki Russia nem tenokdangba tali agütsütsü asoshi bendanga agütsür lir aser mapang kobika südir süaka Ukraine nem teyari agütsütsü," ta minister temi ashi.

Russia-i tangbo parnok inyakyim ajemshir lir, ajisüaka tir Vladimir Putin-i tactical nuclear weapons amshitsü amokmerenba ajanga alima ajungai shisabulua bilemer.

"Russia-i nuclear amshitsü amokmerenba aser Belarus nung nuclear weapon tem amenoktsü sentong yangluba ya agizütsü makok," ta minister temi ashi.

Ukraine nung chemical, biological mesüra nuclear hadir kar danga amshira iba atema telangzüba tesashi agütsütsü, ta parnokisa shisem.

Kasa mapang nung China dak sendakba nung G7 minister temi international community nung khuret angatetba züngsem ka ama inyaksangshitsü ayongzükoogo aser Taiwan Strait yimjung nung toktsütsü ya alima kin ajunga security aser yimji-yimjung atema kanga tongtibang lir ta shiogo.

Minister temisa China-i South China Sea nung parnok arrtsü atsülanga aoba ya temzüng ozüng alema lir ta ashiba den Beijing-i iba tesem temeket nung military inyakyim balala benoka inyaksangshiba agitsüogo.

North Korea dak sendakba nung Pyongyang dang nuclear

aser ballistic missile tem tendangba anentsü takhangba agütsüogo aser tetuyuba ama minyakra alima kintemi longjemer telangzüba agütsütsü ta tekümdangtsü metetdaksüogo.

North Korea-i, parnoki solid-fuel intercontinental ballistic missile (ICBM) ka takok ngua tendangogo ta ashiba sülen anogo ishika lir iba tekümdangtsü metetdaksüogo.

Iba missile tendangba ya tenokdangba agütsüra aliba hadirtem North Korea-i tendangyonga aruba nung tesüsabuba asütsü. Parnoki taküm ICBM aika tendangogo.

Maneni Sudan dak sendakba nung minister temi General Abdel Fattah al-Burhan shiba lenisüba nung military inyaksangshir aser pa anemer Mohamed Hamdan Dagalo, shiba kübok paramilitary Rapid Support Forces (RSF) lir, tena dang rara anena sensaksem tenzüksü asoshi tayongzüka ka agütsüogo.

Sudan military nung RSF züngoksemsü atema benokba onük nung mangatettep adokba sülen Sudan nung Honibarnü rara tenzüksü aser tang tashi nung nisung 200 dak tema tepsetogo aser linük nung international airport ajak shibangogo.

Minister temisa Myanmar nung tang azütokshi lendong balala ataloka aruba aitsüogo, koba military-i sorkar atsünga sülen tamajungba küma odar.

Ano parnoki Taliban-i meimchir temeden anema inyaksangshiba aser tetsürtem nem tenokdangba balala agütsüba aitsüogo.



DIMAPUR DISTRICT AO PENSIONERS TELUNGJEM

Dimapur - 797112 "Nükjidong: "Telungjem aser Teyaritep" "Regd. No. H/RS-4941 of 2008

FREE MEDICAL CAMP

Dimapur District Aor Pensioners' Telungjem ajanga Free Medical Camp ka Aor Pensioners atema 22nd April 2023, Dimapur Mission Higher Secondary School, Khermahal (DABA) nung 10:00 AM nungi akatsü Sentong tajung renema lir. Anungji, Aor Pensioners temi iba angati temoatsü agitsü jangra arutsü ayongzüker.

Sd/
President
DDAPT

Sd/
(Dr. Merennungba)
Convenor, Free Medical Camp
DDAPT

Houthis aser Saudi Arabia na tepuokertem melentep tenzükoogo

Riyadh, Rongchii/April 18 (Agencies): Yemen nung mangatettep adoker aliba telok ana tsünga tepuoker 900 shi

chiokba aser melentepba maparen tenzükoogo aser iba ajanga Saudi envoys aser Houthi telungpurtem tsünga yimjung asoshi sensaksem nung kati ka dak tali temulung lemteta küm daksütsü.

International Committee of the Red Cross (ICRC), shirnoki tepuokertem melentepba maparen achaayangdar parnoki ashiba agi, Yemen aser Saudi Arabia kübok yimti trok tsünga tepuokertem anir senzüksü atema parnok indang tayimtsü amshitsü.

"Iba inyakyim tajung ajanga rara ajanga piladaksür aliba kibong noklang aika longjemdaksütsü. Tepuokertem chiokba ajanga yimden yimsüsüba nunga tebilemtsü bentettsü imlar," ta ICRC indang regional director Fabrizio Carboni-i ashi.

Telok ana yagi taoba hopta Switzerland nung tepuoker 887 chioktsü atema mulungtepa liasü aser ano tepuokertem chioktsü atema May ita ajuruteptsü telemteba agia liasü. Iba tenangzüktepba ya Yemen dangi United Nations envoy Hans Grundberg aser ICRC-i achaayanga liasü.

Sensaksemstürtemi anogo 10 sensak asemba mapang tanungba tepuokertem ajak chiokdaksütsü imla liasü.

Sensaksem ya mapang talangka ka-a arudar aser iba ajanga 2022 aser 2020 küma UN-i achaayanga agiba tenangzüktepba ka kübok tepuokertem chiokkogo. Iba tenangzüktepba dang ya Stockholm Agreement ta ajar.

Yemen yimtiba Sanaa nungi jembiba mapang Houthi affairs analyst Hussain al-Bukhaiti-i Al Jazeera dang, taruba itatem tsünga ano tepuokertem aika melenteptsü imlar, ta ashi.

"Saudi ambassador-i Sanaa semdangba ajanga tepuokertem chioktsü asoshi ken o ya tejakdangi bener ao," ta al-Bukhaiti-i ashi. Yemen nung yimden yimsüsüba tsütsü telemteba ka agitsü atema Hombarnü Oman nung ketdangstürtem den Saudi ambassador Mohamed al-Jaberi-i Sanaa semdangba indang ateshia Bukhaiti-i jembia liasü. "Telok anatsülen nungi

tepuokertem ajak melenteptsü atema parnok renema lir ta Sanaa-i Saudi Arabia nem osang tejangja agütsüogo. Tepuokertem ya 15,000 shi asütsü. Tepuokertem melenteptsü atema sentong yanglur aliba ama inyaksangshitetra Ramadan sülen ano tepuokertem ajak chioktsü atema tenangzüktepba ka yanglutettsü ta bilemer," ta al-Bukhaiti-i ashi.

Political analyst Moneef Ammash Alharbi-i Al Jazeera dang ashiba agi, POW melentepba ya Houthis telungpurtem den masü saka Saudi Arabia aser Riyadh-i nongita yariba Yemen sorkar tsünga inyakteper.

Paisa, tepuokertem melentepba ya Yemen nung telok ana tsünga yimjung asoshi inyakyim tetenzük ka lir, ta ashi.

"Tepuokertem melentepba ya kanga tongtibang jenjang agiba ka lir aser iba ajanga Yemen sorkar aser Houthis na tsünga tali temulung lemteta akümtsü. Iba ajanga Yemen nung yimjung bener arutsü," ta Alharbi-i ashi.

Yemen yimjung asoshi sensaksem ya shilem asem küma lemsar inyaksangshitsü aser mezüngbuba nung yimjung asoshi sensaksemstü atema tenangzüktepba ka yanglutsü aser airport, lenmang aser seaport tem lapoktsü, ta pai ashi.

"Tanabuba shilem nung political party ajak tsünga tangatettep ka dangi arutsü atema yimden yimsüsüba tsütsü sensaksem ka akatsü. Tasembuba shilem nung inyakyim ajak benoka inyaksü, koba küm ana agitsü," ta Alharbi-i ashi.

Yemen nung mangatettep adokba sülen nisung meyirejang aika tepsetogo aser nisung million aika sensak tia-i idaksüogo. Iba rara ya Saudi Arabia aser Iran na tsünga proxy rara ka ama züngshir.

Iran-i teyari agütsüba Houthis telungpurtemi 2014 küm sorkar atsüngtokba sülen Saudi-i aniba telok kati 2015 küm nungi sorkar nem teyari agütsü tenzüka liasü.

Riyadh aser Tehran nati taoba ita tesendaktep yanglushitsü asoshi mulungtepogo aser iba ajanga Yemen nunga yimjung asoshi inyakyim tejakdangi bener odar.



April 18, 2023 : France Tir Emmanuel Macron-i linük nung tensa mejungi aliba süngjemdaksütsü mechi television ajanga jembidang Lyon yimti nung nisung kati chipo-aonpo akoshiha noksa nung angur. Mapa nungi anisüngzüksü arishi küm 62 nungi 64 kumtsüba ajanga nüburtem ain adokba ni angashiogo saka iba temelenshi ya nungdaka liasü, ta Macron-i ashi.

Penli Ward pur 4 Buba Mkg. Inter Ward Football Tournament Final asayatsü jenjang ngutetogo



4 Buba Mokochung Inter Ward Football Tournament mezüngbuba Semi Final Penli Ward aser Tongdentsüyong Ward tsüingda asayadang tangokba noksa.

Mokokchung, Rongchii/ April 18 (TYO) : Tanü Imkongmeren Sports Complex Mokochung nung 4 Buba Mokochung Inter Ward Football Tournament mezüngbuba Semi Final Penli Ward aser Tongdentsüyong Ward tsüingda asayaba nung Penli Ward-i goal 1-0 agi Tongdentsüyong Ward kokteta

Final asayatsü jenjang ngutetogo. Mezüngbuba Semi Final asaya Penli Ward aser Tongdentsüyong Ward tsüingda asayadang telok anaprongji kanga dang junga asayatep aser asayayonga aoba mapang minute 27 buba nung Penli Ward nungi jersey No.5 Imtikoklong yellow card achi. Iba sülen minute 34 buba nung

Penli Ward nungi jersey No.11 Jongshiwati-i goal 1 yokteta iba goal kisüing jagi penli Ward-i Tongdentsüyong Ward kokteta 4 Buba Mkg. Inter Ward Football Tournament Final asayatsü jenjang ngutetogo. **2nd Semi Final 19 April 2023**
Artang Ward
Vs
Sangtemla Ward.

Impact Club-i ayongzüka Open Penalty Shootout Tournament asayatsü

Kohima, Rongchii/April 18 (TYO): Impact Club-i ayongzüka April 22 nü 9:00 ako nungi tenzüka Indira Gandhi Stadium, Kohima nung 1buba Open Penalty Shootout Tournament asyatsü. Iba asayamung akokba team nem senpet sen 60,000 aser runner-up team nem senpet sen 30,000 agütsütsü. Kasa mapang nung best goal keeper nema senpet sen 5000 agütsütsü. Osang ajanga ashiba agi state nung Penalty Shootout asayamung ayongzüka asaya aruba rongnung iba asayamung nung senpet sen timba agütsütsü. Asayamung ayongertemi ashiba agi, lanurtem parnok sempet arantgetshidaksütsü

aser asayar ka ama tetoktepba yimya tajung sübadaksütsü atema tajangzük akaba asayatem nung shilem agidaksütsü nukjidong nung iba asayamung ayongzükogo. Impact Club ya mapa aser wadang balala nungi mulung ajemer tembartemi tentetba lir, shirnok tajangzük akaba sentongtem ayongzüka lokti nung temelenshi tajung bener arutsütsü atema longjemogo. State kübok kinük nung aliba tesemtem tongteta saisapong, education aser teyari balala ajanga nüburtem taküm melenshidaksütsü asoshi nukjidong lir, ta Impact Club-isa metetdaksü. Iba asayamung nung shilem agitsü atema team shia

registration fee sen 3000 agitsü aser tejangrar ajaki shilem agitettsü. Osang tejangjaba agitsü mesüra online registration atema asayamung ayongertem den item number; 7640830161/9856849052 ajanga tongteprateptettsü. Asayamung nung shilem agitsü atema züngoksemtsü asoshi tatembangbuba anogoji April 21 nü nikongtsütsü 4:00 ako tashi asütsü. Form tem Kohima kübok Education Connection (Near Ao Baptist Church Kohima), D'Cafe (Jail Colony) nung angutsü aser Dimapur nung Barista (Duncan, Dimapur), Baskin Robbins (Chumoukedima) nung angutsü.



New Delhi: Mt Annapurna tenem kolak nungi meyipa aluba mapang Camp IV anasa samaba sülen anogo ka lir India tsür tenemi atur Baljeet Kaur taküm lia ngutetogo, ta ketdangsrü kati metetdaksü. Noksa nung Baljeet Kaur tangokba angur.

Argentina nung U-20 World Cup ayongzüka asayatsü Rongchii/April 18, 2023

(Agencies): Argentina nung Under-20 World Cup May 20 nungi June 11 tashi ayongzüka asayatsü, ta FIFA-i metetdaksüogo. Iba asayamung asayatsü hopta ka dang lia Indonesia nung iba asayamung ayongzüka masayatsü atema telemtetba agiba sülen iba maangka Argentina nem agütsüogo. Asayamung ayongzüka asayatsü atema maangka agütsüba sülen Indonesia melena iba asayamung nung Argentina asayatsü. Argentina pur iba asayamung nung asayatsü atema qualify mesütefi liasü. "FIFA U-20 World Cup Argentina nung ayongzüka asayatsü asoshi telemtetba agiba osang FIFA-i pelashishia sangdonger. World club akokba linüki football asaya nung tarutsü asayatem atema kishi lapoktsüogo," ta FIFA tir Gianni Infantino-i ashi.

World Cup nung Israel asayatsü aliba anema longkak aitba sülen FIFA-i Indonesia nung iba asayamung ayongzüka masayatsü atema telemtetba agia liasü. Indonesia aser Israel na tsüingda tesendaktep kecha mali aser Muslim nungeri amokbanger aliba linük nung ya Palestine nung pusemer aika lir. Argentina-i iba asayamung ayongzüka asayatsü atema benok aser FIFA-i taoba hopta asayamung ayongzüka asayatsü aliba tesemtem asadangogo. Asayamung atema draw April 21 nü Zurich nung asütsü. FIFA-i iba osang mesangdong tsüingda Argentina sorkari, Argentine Football Association (AFA)-i iba asayamung ayongzüka asayatsü atema bid asüba takokba tashi nongita yaritsü ta shir liasü. Tang tashi nung Under-20 World Cup ya Argentina-i timbaben koka lir. Parnoki iba asayamung trokben kokogo.

IPL Code of Conduct nung aibelenba atema Kohli dang senchi achi



New Delhi, Rongchii/April 18 (Agencies): Chennai Super Kings den M Chinnaswamy Stadium nung asayaba mapang IPL Code of Conduct nung aibelenba atema Royal Challengers Bangalore batter Virat Kohli dang pa indang match fee shilem 10 senchi chiogo. "M Chinnaswamy Stadium, Bengaluru nung TATA Indian Premier League (IPL) 2023 nung Chennai Super Kings (CSK) den asayaba mapang IPL Code of Conduct nung aibelenba atema Royal Challengers Bangalore (RCB) batter Virat Kohli dang pa indang match fee shilem 10 senchi chiogo," ta IPL sangdong ka ajanga metetdaksü. "Kohli-i IPL Code of Conduct Article 2.2 kübok aibelenba nangzükogo," ta kasa sangdong ajanga metetdaksü. Temetettsükaji Code of Conduct Level 1 nung aibelenba atema Match Referee temi kechi telemtetba agidir aji melenshitsü makok. IPL sangdong ajanga pa

dang kechiba senchi achi iba indang osang tejangja magütsü, ajisüaka CSK batter Shivam Dube out sütsüba sülen parnok pelatepba mapang Kohli-i alia inyaksangshiba atema senchi achi asütsü ta bilemer. Dube ya over 17buba nung Mohammed Siraj-i deep nung catchout süja liasü. CSK den asayaba mapang Virat-i junga masayateti liasü. Left-arm pacer Akash Singh-i aonba ball ka six züktokba sülen tia maka pa indang bat nung ball ondaker lua stamp nung ball agi onshia pa out asü. CSK puri run 227 yanglur aliba arishiba mapang pa mezüngbuba over nung out süatok. Iba asaya nung CSK atema Devon Conway (45 ball, run 83) aser Shivam Dube (27 ball, run 52) nati kanga junga asaya parnoki asayar 6 out ser run 226 yanglua liasü. Asaya tanabuba shilem nung Glenn Maxwell (36 ball, run 76) aser Faf Du Plessis (33 ball, run 62) natia kanga junga asaya ajisüaka iba asaya CSK puri run 8 agi koka liasü.

BILEMDANGANG
"Temaotsü ya meranga inyakertem meyong."